

## Хутбе 8

Аллаһу Та'ала Къур'ан-и Керимде «Аз-Заррият» суресининъ 56-инджи аетинде шойле буюра:

Бу аетнинъ манасы шойле: «Аллаһ джинлерни ве инсанларны ибадет этмелерини эмир этмек ичюн яратты, башкъа бир шей ичюн яратмады».

Бу ает-и керимеден анълашыла ки, джинлер ве инсанлар Аллаһкъа ибадет этмелери ичюн яратылды. Инсанлар арасындан, Ислам динини анълатмакъ ве огретмек ичюн Аллаһу Та'ала Пейгъамбер ве Ресуллерни сечти. Пейгъамберлер инсанлар арасында энъ устюн, энъ салиһ, энъакъыллы ве энъ джесюр инсанлардыр.

Аллаһ «Эн-Эн'ам» суресининъ 86-инджи аетинде шойле буюра:

Яни: «Аллаһ, бутюн Пейгъамберлерни яратыкъларындан устюн къылды».

Бу ает-и кериме бизге Пейгъамберлернинъ Мелеклерден, Эвлиялардан, джинлерден ве къалгъан бутюн яратыкълардан даа устюн олгъаныны бильдире. Эр бир мусульмангъа буны бильмек ве бунъа инанмакъ фарздыр.

Ойле инсанлар бар ки, олар базы салиһ къулларны Пейгъамберлернинъ дереджесине я да ондан да юксек дереджеге чыкъаралар. Бу – харам, куфюрдир. Аллаһ бизни бундан къорчаласын.

Пейгъамберлернинъ дереджеси Мелеклернинъ ве Эвлияларнынъ дереджесинден фаркълыдыр. Эр бириси озюнинъ дереджесине ляйыкъ олгъаныны къабул этмек ве бунъа инанмакъ фарздыр.

Пейгъамберлер акъкъында билинмеси ве инанмасы фарз олгъан шейлерден базылары шулардыр:

1. Адем алейһи селямдан башлап Мухаммед Пейгъамберимизге къадар кельген бутюн Пейгъамберлер Ислам динини анълаттылар.

Аллаһу Та'ала «Аль-Имран» суресининъ 19-инджи аетинде шойле буюрды:

Яни: «Аллаһ, къулларындан къабул эткен Хакъ Дин – Исламдыр».

Башкъа бир аетте Аллаһ буюрды:

Аетнинъ манасы шойле: «Ким Исламдан башкъа бир динни тутса, ондан къабул олунмаз ве о ахиретте гъайып эткенлерден оладжакътыр».

Бу аетлер бизге, бутюн Пейгъамберлер Ислам дини иле кельгени ве дигер динлер догъру олмагъаныны исбатлайлар.

Базы китапларда Исламдан гъайры дигер динлерге «семавий динлер» денильмекте. Бойле айтмагъа ич олмаз. Башкъа динлерге «семавий дин» айтмакъ – куфюрдир. Семавий дин – тек Исламдыр.

2. Бутюн Пейгъамберлернинъ озьлерине якъышкъан гузель ве устюн сыфатлары бар олгъанына ве озьлерине келишмеген сыфатлардан темиз олгъанына инанмакъ фарздыр.

3. Пейгъамберлер ич ялан сёйлемегенине ве айткъан сёзлерининъ эписи керчек, догъру олгъанына инанмакъ фарздыр.

4. Пейгъамберлернинъ эписи чокъ зекий эди. Аллаһ оларгъа ойле акъыл берди ки, айткъан исбатларнен къаршы чыкъкъанларны айретте къалдыра эдилер.

5. Пейгъамберлер энъ джесюр инсанлардыр, душманларындан ич къоркъмаз эдилер. Саһабелернинъ ривает эткенлерине коре, бир дженкнинъ энъ шиддетли вакътында олар (яни саһабелер) Пейгъамберимизнинъ аркъасында сакълангъан эдилер. Бу да Пейгъамберлернинъ не къадар джесюр олгъанына исбаттыр.

6. Бутюн Пейгъамберлер намуслыдыр, оларны утандыргъан бир шей япмаз эдилер.

7. Бутюн Пейгъамберлер ишанчлыдыр, яни эманетке хыянет этмез эдилер. Пейгъамберимизге, пейгъамберлик вазифеси кельмезден эвель, «Мухаммед Эмин» дей эдилер, яни «Эминнинъ» манасы – «эманетке хыянет этмеген».

8. Аллаһ, бутюн Пейгъамберлерни, пейгъамберликтен эвель ве сонъра, куфюрден, буюк гунаһлардан ве ашалайыджы кучюк гунаһлардан къорчалагъандыр, яни Пейгъамберлер бир юзюм танесини сабысындан сорамайып алмаз эдилер. Лякин базы пейгъамберлер ашалайыджы олмагъан кучюк хаталар япкъанлардыр, меселя, Адем алейһи селям теректен ашагъаны киби.

9. Бутюн Пейгъамберлер, Аллаһнынъ оларгъа бильдиргенини эксиксиз оларакъ инсанларгъа бильдире эдилер. Пейгъамберлер, бильдирген мевзуларда догъру эдилер, алгъан эмирлерге бир шей къошмайып оларны эксиксиз бильдирген эдилер.